

**INKULUMO KANGQONGQOSHE WEZOKUTHUTHA, UKUPHEPHA
NOKUXHUMANISA UMPHAKATHI UMNUZ WILLIES MCHUNU EMCIMBINI
WOKUVULWA KOMGWAQO NAMABHULOHO AMABILI ENQUTHU
MHLAKA 08 JUNE 2010**

Mphathi wohlelo;
Inhloko yoMnyango uMnuz Chris Hlabisa;
Imeya yoMkhandlu;
Amakhansela;
Amakhosi;
Izinduna;
Izikhulu zeminyango ngokwehlukana kwayo;
Amalungu e-RRTF, ama-CRSC, i-PTPA, uVukuzakhe noZibambeke;
Abezindaba;
Umphakathi wonke ngiyanibingelela.

Namhlanje sisalelwe izinsuku ezimbili ukuthi sibone kuqopheka umlando ezweni lethu sekuqala umqhudelwano weNdebe yomhlaba. Ezweni lonke emiphakathini kukhulunywa ngeNdebe yoMhlaba.

Kodwa siyazi ukuthi ukukhuluma akufani kubantu abehlukene. Abanye bajabulela ukufika kwayo ngoba bezuze okuthile abakubona ngamehlo, abanye bajabulela ukufika kwayo ngaphandle kokubheka ukuthi kukhona yini abakuzuzile bona ziqu zabo kanti abanye bababaza ukujatshulelwa kwayo bebe bona bengaboni lutho abazoluzuzisa ngayo.

Mhlambe umuntu akathathe ithuba aqale ngokuchaza ukuthi njengoba sihlala ezweni elikhulu futhi isifundazwe sethu sinabantu abaningi kangaka, uma kunemicimbi eletha amathuba ehlukeni ngeke wonke umuntu kuzo zonke izindawo ahlomule ngqo mhlambe ngemali azoyithola ngokubamba iqhaza kulowo mcimbi.

Kodwa okumele sikwazi ngukuthi imicimbi enjengeNdebe yomhlaba ivula namathuba okuxhumana nakosomabhizinisi okungathi kamuva benze izivumelwano zokutshalwa kwezimali ezindaweni zemiphakathi okuhlanganisa nezindawo zasemakhaya njengalapha eNquthu.

Imali ezongena ezweni ngokuza kweNdebe yomhlaba iyona futhi ezosiza ukufeza umbono kaHulumeni wokuletha intuthuko ngamawala ezindaweni zasemakhaya. Okusho ukuthi akulona iqiniso ukuthi kuzohlomula mhlambe abasemadolobheni azosingatha imidlalo kuphela.

Siyazi futhi ukuthi indawo yaseNquthu inanomlando obalulekile okunabantu abavela emazweni ase-Europe abangeke bathande ukuphuma KwaZulu-Natal bengazange bazobona eSandlwana naseNcome.

Ngakho-ke, ukuza kwethu lapha namhlanje kuhlangukisa nokuzokhumbuza labo abathi ababoni lutho ngoba imisebenzi yeNdebe yomhlaba yenzeka kude nabo. Sizobakhumbuza ukuthi phela besishilo phambilini ukuthi njengoHulumeni sifuna ukuqinisekisa ukuthi ngenkathi sigxila ku-2010 nangemuva kwawo, siyaqhubeka nokuletha imigwaqo emiphakathini yasemakhaya engathintekile ngqo emisebenzini ka-2010.

Namhlanje sizohalalisela umphakathi waseNondweni ngokuba noHulumeni onezindlebe futhi ozwayo. UHulumeni wethu wakuzwa ukukhala komphakathi ngesimo somgwaqo uMain Road 36-2 njengoba usufakwe itiyela.

UHulumeni wayengeke angawuphenduli umphakathi Ekukhanyeni naKwaVoyiza uma ukhala ngenkinga yokuwela umfula iNondweni njengoba namhlanje sewunebhriji nje. UHulumeni ubengeke avume ukuthi ikusasa lezingane zaseBongumenzi High, eNtanyandlovu High naseSunrise Primary liqedwe izingozi zomgwaqo ngenxa yokungabikhona kwebhriji lapho ziwela khona umgwaqo.

Siyabonga futhi ukuthi ekwenziweni kwale misebenzi yamabhriji nomgwaqo, oSonkontileka bahambe ngomyalelo kaHulumeni, ikakhulukazi lo Mnyango wezokuThutha, wokuthi kumele abantu bendawo kube yibona abahlomula ngamathuba emisebenzi.

Ibhriji lomfula iNondweni lakhiwe ngo-R4,2 million kwathi iSunrise Pedestrian Bridge yakhiwa ngo-R850 000 kanti umgwaqo uMain Road 36-2 usufakwe itiyela ngo-R34 million amakhilomitha angu-12. Lo mgwaqo ongamakhilomitha angu-24 kulindeleke ukuthi ugcine udle imali engu-R90 million uma usuphothulwa ngoMay 2012.

Kuyangijabulisa ukuthi eNquthu sesinoZibambe abangu-1466 abanamaqembu okonga (saving clubs) angu-39 okusiyibalo esiphezulu esiFundeni saseMzinyathi. La ma-saving clubs asekwaze ukonga imali engaphezulu kuka-R 359 000. Sigqogquzela abasingethe lolu hlelo kule ndawo ukuba baqinisekise ukuthi osonkontileka bakaZibambe baqokwa ngokubheka izinga lobuphofu emiphakathini yabo, hhayi ukusebenzisa ubuqembu bepolitiki ezinhlelweni zikaHulumeni.

Kukhona neminye imisebenzi esiyenzile ezindaweni ezingaphansi kwe-RRTF yaseNquthu ngonyaka wezimali odlule ka-2009/10, njengokwakhiwa kwemigwaqo yezindawo (local roads) ngemali engaphezulu kuka-R4 million. Le migwaqo ihlanganisa iMatshana Local Road, uHoqo Local Road, uZithozide Local Road neThelaphi Local Road.

Eminye imigwaqo esiyilungisile sayifaka inkwali kabusha ngonyaka odlule wezimali ihlanganisa u-L1190 eNkosini uSithole, uP50/4 KwaJama, uD1361 KwaMolefe, uD1292 KwaJiyane, u-L1987 KwaMolefe, u-L1848 KwaMolefe, noP16/4 KwaJiyane. Konke lokhu kudle u-R6,4 million.

Kulo nyaka wezimali esikuwona sihlele ukulungisa sifake inkwali emigwaqeni ehlanganisa uD1958 eNkosini uNgobese, uD2251 KwaNgobese, uD30 KwaMolefe, noD1297 KwaNgobese. Lapha ibalelwa ku-R3,1 million imali efakiwe.

Nakuba singenayo imali eyanele, sizolokhu sizama ngokusemandleni ukuvala igebe ngokufuqa umkhankaso ka-Operation Kushunquthuli ukuze ekugcineni izimpilo zabantu baKwaZulu-Natal zibe ngcono kunayizolo nekusasa labo libe ngcono kunelanamuhla.

Lapha esiFundeni saseMzinyathi jikelele ingu-R120 million imali efakwe emisebenzini yokwakha nokugcina imigwaqo isesimweni kulo nyaka wezimali. Ngaphansi kwe-RRTF yaseNquthu khona sifake u-R20 million. Konke lokhu kusagcizelela ukuzibophezela kwalo Hulumeni ekuthuthukisweni kwezindawo zasemakhaya.

Sengiphetha, manginxuse umphakathi wonke walapha eNquthu ukuba ubambisane nohulumeni ekulweni nobugebengu, kuphele ukwebiwa kwemfuyo okuvame ukukhalwa ngako ezindaweni ezinjengalezi.

Abantu abanentshisekelo yokulwa nobugebengu mabasebenzisane nezinhlaka ezibekwe nguHulumeni njengama-CPF ukuze kungabi namaqembu asungulwayo athi alwa nobugebengu uHulumeni ebe engawazi. Noma ngingafuni ukungena kakhulu kulolu daba okwamanje, kodwa siyezwa ukuthi ngapha eSandlwana sebekhona abathi sebenenhlango elwa nobugebengu.

Kumele nazi ukuthi uma nakha amaqembu okulwa nobugebengu bese nisebenza ngendlela ephambene nomthetho kuzojika kukhale nina nithi uHulumeni ungasezigebengwini uma nani seniboshwa. Masibambisane sakhe imiphakathi yakithi ngendlela ehambisana nomthetho wezwe.

Ekugcineni masihalalisele bonke abantu baseMzinyathi ngemisebenzi yentuthuko asebeyizuzile nabasazoyizuzwa kulo Hulumeni. UHulumeni oholwa nguMsholozu kuzwelonke noKhabazela esifundazweni uzohlale ungasohlangothini lwabampofu ikakhukazi ezindaweni zasemakhaya.

Ngiyabonga.